



Inatsisartuni ilaasortaq Isak Hammond, Inuit Ataqtigiit
MAANI

Qilalukkanik qernertanik pisassiissutit, misissuisimanerit nutaat tunngavi-galugit amerlanerusunik pisassiisoqarsinnaanera Naalakkersuisunit eqqarsaatigineqarnerisoeq pillugu Naalakkersuisunut apeqqutip nr. 80-p akineqarnera

20. april 2010
j. nr. 2010-80
Postboks 269
3900 Nuuk
Tlf. (+299) 34 50 00
Fax (+299) 32 47 04
E-mail: apnn@gh.gl
www.nanoq.gl

Inatsisartut suleriaasianni § 36, imm. 1 malillugu Canadap Kalaallillu Nunaata akornanni imartami qilalukkat qernertat kisinneqarnerisa tamanut saqqummiunneqarnerat pillugu apeqquteqarputit. Apeqqutigineqartoq naalakkersuisoqarfinniit akineqartussanngorlugu ingerlatinneqarsimavoq.

1 Qilalukkanik qernertanik pisassiissutit, misissuisimanerit nutaat tunngavi-galugit amerlanerusunik pisassiisoqarsinnaanera Naalakkersuisunit eqqarsaatigineqarnerluni?

1-mut) Canadap issittortaani Canadamiut qilalukkanik qernertanik kisitsisimanerat pillugu apeqquteqarnerpit akineqarnissaa pillugu Pinngortitaleriffik attaveqarfigineqarpoq paasissutissanik erseqqinnerusunik piniarfigalugu.

Kalaallit Nunaata Radioata ilanngutassiaani 11. april 2010-meersumi "Ilimagisatut Canadami qilalukkat qernertat marloriaammik amerlanerupput"-mik qulequtalerneqartumi ilanngutassiaq saqqummersartumi "Arctic"-mi saqqummersitaq pineqarpoq. Pinngortitaleriffik saqqummersitaq taassuma allanneqarneranut ilanngussaqaarnikuvoq, tamannalu 2002 – 2004-mut timmisartukkat kisitsineq aqqutigalugu paasissutissanik aallaaveqarpoq **Canadap eqqaani** makkunani: Barrow Strait, Prince Regent Inlet, The Gulf of Boothia, Admiralty Inlet, Eclipse Sound kiisalu Baffinip qeqertaata kangiaata sineriaa.

Misissuineq paasissutissallu pigineqalersut kingusinnerusukkat ataatsimoortumik ilisimatusarnikkut ataatsimiititaliap Atlantikup Avannaani Immami Miluumasut Pillugit Ataatsimiittartoqatigiit / Qilalukkat qaqortat qernertallu pillugit Canadap Kalaallit Nunaatalu Ataatsimoorussamik ataatsimiititaliaata (NAMMCO/JCNB) ataaniittup 2005-imi Nuummi ataatsimiinnerani saqqummiunneqarput. Ataatsimiititaliaq taanna Qilalukkat qaqortat qernertallu pillugit Canadap Kalaallit Nunaatalu Ataatsimoorussamik ataatsimiititaliaanut / *Joint Commission on Conservation and Management of Beluga and Narwhal (JCNB)*, *ilisimatusarnikkut siunnersuisartuuvoq, kingusinnerusukkullu ukiumoortumik ataatsimiinnermini Kalaallit Nunaannut Canadamullu nunanut taakkununga pisassiissutit pillugit siunnersuisarlutik.*

2005-imi ataatsimiinnermi isumaqatigiissutigineqarpoq paasissutissat misissoqqinneqassasut, kingornatigullu suleqatigiissitamik pilersitsisoqarpoq.

Pinngortitaleriffik timmisartumik kisitseqqissaarnermi siunnersuisutut peqataavoq, pingaartumik qilalukkat aqqaqqasut takuneqarsinnaanngitsullu kiseqqissaarneranni. Tamanna satelliti atorlugu nalunaaqutsiinerit ikiortigalugit ingerlanneqarpoq. 2009-mi kingusinnerusukkat ataatsimiinnermi paasissutissat nutaat misissoqqissaakkat saqqummiunneqarput akuerineqarlutillu, tamatumalu kingorna JCNB-ip siunnersuineraniit Canadamut Kalaallit Nunaannullu tunniunneqarlutik. Taamaaliornikkut angusat kisitsinernit ukiunik 6-8-nik pisoqaassuseqartuneersut Canadamut siunnersuinermit ilanngunneqareerput toqqaannanngitsumillu nunatsinni biologit siunnersuinerannut ilanngunneqarlutik, taamaaliornikkullu aamma qilalukkanut qaqqortanut qernertanullu pisassiissutissanut pilersaarummut ukiuni pingasuni atuuttussamut ilanngunneqarluni ukiumut qilalukkat qaqqortat qernertallu 310-t pisarineqarsinnaallutik, tamannalu Naalakkersuisunit ulloq 13. august 2009-mi piffissamut 2009-2012-mut akuersissutigineqarpoq. Siunnersuineq tamanna 2009-mi kommuninut nalunaaruteqarnermut tunngaviliisuvoq.

Baffinip Qeqertaa kaajallallugu qilalukkat amerlassusiinut naliliinerit siusinnerusukkat naliliinerniit qaffasinnerupput, ilaatigut imartaq annertuneq misissuiffigineqarsimammatt ilaatigullu qilalukkat nakkutilliisumit takuneqanngitsut qilalukkallu aqqaqqasut takuneqanngitsut iluarsineqarsimammata.

Kalaallit Nunaannut kingunerisassai paasiuminaapput. Qilalukkat qernertat amerlanersaat Canadami nalunaaqutserneqartut amerlanersaat Baffinip Kangerliumarngata / Davisip Ikerata qeqqani ukiisarput. Nerisaasa ilaatigut amerlanersaraat qalerallit, taamaalillutillu toqqaannanngitsumik kalaallit aalisartuinut sunniuteqarsinnaallutik. Taamaattorli qilalukkat sinerissamut ungasissumiipput kalaallillu piniartuinit anguneqarsinnaanatik. Qilalukkat qernertat nerisaannut erseqqinnerusumik paasisaqarniaraanni Jakob Skade-p, Kattusseqatigiit Partiiat, § 36 naapertorlugu apeqqutaa 131 takuneqarsinnaavoq.

Pinngortitaleriffik Niaqornani qilalukkamit qernertamit nalunaaqutsikkamit paasissutissanik peqarpoq, taannalu Canadap Issittuani angalaarsimavoq, taamaalillunilu Nunavut Uummannallu akornanni ataqatigiittoqarnissaa ilimagisariaqarluni. Kalaallit piniariartarfiisa assigiinngitsut (Puikkaasorsuaq, Avannarliit, Qimusseriarsuaq, Uummannaq aamma Qeqertarsuaq/eqqaa) kiisalu taakkua Nunavullu akornanni ataqatigiittoqassappat ataqatigiinnissaannut apeqqutit akineqarnissaat annertuumik pingaartinneqarpoq.

Massakkorpiaq Naalakkersuisut erseqqissumik isumaqarput allamik uppersaasoqanngippat erseqqissaasoqarnanilu inassutigineqartut Piniarnermut Siunnersuisoqatigiinni suliarineqareersut naapertorlugit pisassiissutit aalajangersakkat aalajangiusimaanneqassasut.

Inussiarnersumik inuulluaqqusillunga

Ane Hansen
Aalisarnermut, Piniarnermut Nunalerinermullu Naalakkersuisoq